



Skólaslit

Afhending einkunna fimmtudaginn 5. júní

kl. 9:00	1. og 2. bekkur
kl. 10:00	3. og 4. bekkur
kl. 11:00	5. og 6. bekkur

Allir mæti í hátíðarsal og fara síðan í bekkjarstofur.
Foreldrar eru velkomnir á skólaslitin.

kl. 12:30 7. bekkur útskrift
(mæta fyrst í bekkjarstofu en gestir í sal)



Skólaþetning verður 22. ágúst 2008

Gleðilegt sumar

Skóladagatal næsta skólaárs er að finna á www.flataskoli.is

Fréttabréf Flataskóla

1. tbl. 24. árg. maí 2008



Starfsfólk Flataskóla þakkar nemendum og foreldrum
ánægjulegt samstarf á skólaárinu og óskar öllum
gleðilegs sumars.

Frá skólastjóra

Nú er skólaárið senn á enda. Skólastarfið hefur gengið vel og verið fjölbreytt að vanda. Nemendur hafa staðið sig vel í náminu og margir tekið góðum framförum. Stöðugt er unnið að þróun kennsluhátta með það að markmiði að skapa nemendum sem best skilyrði til náms. Einnig hefur orðið þróun í námsmati sem er orðið mun fjölbreyttara.

Margir hefðbundnir viðburðir eru jafnan í skólastarfinu og má þar nefna sem dæmi skákmót, fjöltefli, ljóðasamkeppni og upplestrarkeppnir.



Nemendur fara einnig í ýmsar ferðir tengdar náminu og er þannig unnið markvisst að því að gera kennsluna sem fjölbreyttasta. Ekkert gjald er innheimt af nemendum fyrir ferðir sem farnar eru á skólatíma. Þó má geta þess að nemendur 7. bekkja sem fóru í skólabúðir á Reykjum í Hrutafirði greiddu fyrir fæði.

Verkefnið SMT – skólaferni hóf göngu sína sl. haust. Markmið þess er að fyrirbyggja, draga úr og stöðva hegðunarfrávik og þar með skapa jákvætt andrúmsloft í skólanum. Síðir skólans eru kenndir og veittar eru viðurkenningar, sólir, til þess að styrkja jákvæða hegðun. Segja má að verkefnið hafi farið vel af stað og bæði nemendur og starfsmenn leggi sig fram í að skapa góðan skólabrag.

Flataskóli fékk afhentan Grænfánann í janúar og er þar með kominn í hóp þeirra skóla sem leggja áherslu á umhverfismennt.



Á haustönn fór fram mat á sjálfsmati grunnskóla á vegum Menntamálaráðuneytisins. Alls voru 26 skólar víða á landinu metnir í þessu úrtaki. Flataskóli var annar af tveimur skólum sem stóðst öll viðmið ráðuneytisins í matinu. Það er mikill styrkur fyrir skólann að fá svo góða niðurstöðu.

Útikennsla. Meðal nýjunga í skólastarfinu í vetur var unnið að hönnun útikennslustofu. Hún er í Vigðisarlundi og verður vígð formlega á 50 ára afmæli skólans í október. Í vetur hafa nokkrir árgangar verið í skipulagðri útikennslu.

Listadagar ungs fólks í Garðabæ fóru fram í apríl. Nemendur Flataskóla unnu margvísleg verkefni í tengslum við listadagana. Sem dæmi má nefna stóra köngulóarvefi, vindhópur, vindhana, mósaik á steina, máluð tjörn á skólalóðinni og myndir í undirgöngum. Einnig voru nemendur 6. bekkja með stompatriði á skólalóðinni.

Flataskóli hefur fengið úthlutað tveimur þróunarstyrkjum fyrir næsta skólaár. Verkefnin eru Byrjendalæsi og Útikennsla í Flataskóla sem fengu styrki frá Þróunarsjóði grunnskóla.



Foreldrafélag skólans sendi tvær tilnefningar til Foreldraverðlauna Heimilis og skóla. Tilnefndar voru heimasíður árganga og verkefnið Þjóðadagur – Börnin okkar. Þær Ingibjörg Baldursdóttir bókasafnsfræðingur og Svanhvít Guðbjartsdóttir kennari fengu Dugnaðarförkaverðlaun samtakanna.

Foreldrafélagið tilnefndi Hjördísi Ástráðsdóttur tónmenntakennara til Íslensku menntaverðlaunanna. Arnheiður Borg sérkennari og Elín Margrét Gunnarsdóttir, kennari hafa einnig verið tilnefndar til Íslensku menntaverðlaunanna.



Hafinn er undirbúningur 50 ára afmælis skólans sem verður 18. október. Ákveðið hefur verið að næsta skólaár verði helgað afmælinu. Atburðardagatal verður gert og mun afmælisins verða minnst á fjölbreyttan hátt. Fyrirhugað er að ljúka afmælisárinu með sýningu og hátíð vorið 2009.



Nú á vordögum flyst kennsla nemenda úr skólastofum út í vorið. Dagarnir að loknum prófum eru vel skipulagðir og njóta nemendur þess að læra um náttúruna og taka þátt í margvíslegum verkefnum og leikjum. Það er mikilvægt að benda á að þetta eru skóladagar og nemendur eiga að sjálfsögðu að mæta þessa daga.

Uppskeruhátíðir og vortónleikar nemenda hafa verið á dagskrá síðustu daga. Nemendur stóðu sig með mikilli þrýði og voru sér og skólanum til sóma.

Margir gestir komu á þessa viðburði.

Samstarf við foreldraráð og foreldrafélag hefur gengið vel og hafa foreldrar veitt margvíslegan stuðning við skólastarfið. Foreldrafélagið færði skólanum gasgrill að gjöf og verður það notað á íþróttadaginn þegar grillaðar verða pylsur. Fyrir hönd skólans þakka ég foreldrum gott og gefandi samstarf.

Heimasíða skólans er virkur upplýsingamiðill um skólastarfið og mikilvægt að foreldrar fylgist vel með fréttum á heimasíðunni. Einnig má geta þess að ársskýrsla skólans verður sett inn á heimasíðuna í júní.

